



Vid la scorsa d'in ischi contaminats dil buliu *Cryptostroma corticale* cumpara suenter in cert temps in film da fulin. Igl ei nuot auter che las sporas ch'il vent porta vinavon.



«A Trun sut igl ischi, nos babs ein serimnai»: Cheu ina renomada illustraziun digl onn 1821 dalla cuntrada culla caplutta da s. Onna.

Fulin silla scorsa digl ischi

Ina malsogna periclitescia igl ischi da muntogna

DAD AUGUSTIN BEELI / FMR

■ Igl ischi ei ina planta da muntada speciala per la Surselva. El ei colli-giaus culla historia dalla Ligia Grischa. Sch'ins vul ch'igl ischi da muntogna survivi drov'el actualmeins atenziun speciala. La malsogna dil fulin dalla scorsa sederasa en Svizra. La vischnauna da Trun ha en siu uoppen in fegl da quella planta. Igl ei era igl emblem naziunal dil Canada. Igl ischi ei ina dallas enconuscentas plantas da cultura dil carstgaun. La historia dil Grischun ei colligiada specialmeins cugl ischi, pertgei igl engriment dalla Ligia Grischa han ins fatg 1424 sut quel sper la caplutta da s. Onna a Trun. Schizun il num dil cantun Grischun sereferescha sin quei fatg historic. Buc in ruver, buc ina glienda ed era buc in fau, mobein in ischi ei staus punct da partenza dallas Treis Ligias. En quater onns commemoresch'ins il giubileum da 600 onns ed in comite a Trun ha entschiet cun las preparativas.

Aunc buc el Grischun

Evidentameins vegn igl ischi el curtgin d'honor sper la caplutta da s. Onna ad esser integraus il 2024 en ina fuorma ni l'otra. Igl ei da sperar che la planta attachada seigi tochen lu aunc sidretg. Sco quei che la revista svizra «Wald+Holz» informescha en sia ediziun dil fevrer s'avonza numnadameins la malsogna dil fulin dalla scorsa, per tudestg «Russrindenkrankheit». Igl inschignier forestal *Mario Vanoni*, collaboratur digl Uffeci cantunal d'uual e prighels dalla natira dil Grischun, conferma ils fatsgs. La malsogna dil ischials seigi daferton sederasada ella Svizra franzosa tochen Solothurn. Il rapport ella revista «Wald+Holz» tracta ils cass ch'ins ha constatatu a Basilea. La stad 2018 hagian ins stuii pinar las empremas plantas el parc dil marcau. Lu fuva la malsogna denton aunc buc enconuscenta e descretta. Pér la stad 2019 hagian ins anflau il ver motiv ed identificau il buliu nuscheivel che fageva pirir ils

ischials. Las biaras plantas contaminadas han ins constatatu entochen oz en parcs e sper vias. Pinar las plantas contaminadas dil fulin dalla scorsa ei mingamai in'aziun speciala, pertgei ils bostgers ston trer en vestgadira da schurmetg e metter si mascras. Auter che malsognas da plantas ch'ins enconuscheva entochen uss ei il fulin dalla scorsa nuscheivels pil carstgaun (mira boxa).

Suenter la muria digl uolm, la muria dils fraissens e dalla tieua cotschna che pirescha pervia dalla schitgira suonda uss ina proxima sfida. Vanoni relativescha la situaziun. El conferma alla FMR che la malsogna seigi enconuscenta, ch'ella hagi entochen oz per cletg aunc buca contonschiu il Grischun. «Il prighel ei per franc cheu. Entirs uuals d'ischials dat ei denton buca cheu tier nus.» Las plantas seigien plitost isoladas e spatitschadas, aschia seigi la resca d'in'epidemia pli pintga.

Igl inschignier forestal conceda ch'ei seigi impurtont da sensibilisar la popula-

ziun per quella malsogna dils ischials. Malgrad ch'igl ischi hagi pauca impurtonza economica dueigien ins restar atents il proxim temps. Tonpli che la mal-

sogna sa esser in prighel pil carstgaun. E tonpli che lez, silmeins las Sursilvanas ed ils Sursilvans, han ina relaziun speciala cun quella planta.

Cryptostroma corticale, il fulin dalla scorsa

Sco biars neofits e neozons ei il buliu ch'attacca dapresent igl ischi da muntogna in import dall'America dil nord. Leu han ins constatatu el gia avon 130 onns. Ell'Europa enconusch'ins il buliu dapi il 2005. Pertuccai ein principalmes ischials da muntogna, denton era igl ischi campester, igl ischi d'argien ed igl ischi culla feglia en péz. Las davosas stads cun caliras extremas ein stadas d'avantatg pil buliu da fulin. Las sporas dil «*Cryptostroma corticale*» havevan eventualmeins contonschiu gia pli baul plantas, senza denton periclitatar ellas. La schitgira extrema ha sin quei spossau ellas da tala maniera ch'il

sistem d'immun ei buca staus el cass da frenar l'attaca. Vid la scorsa digl ischi ves'ins igl emprems ad egl carschientschas ed ina mutschegna bletscha. Lu scarpa la scorsa e parts entscheivan a pirir. El proxim stadi rumpa la scorsa dapi e las sporas dil buliu cumparan en massa. Quellas semeglian in film ner da fulin, perquei il num «fulin dalla scorsa» e per tudestg «Russrindenkrankheit».

Contact intensiv cun quellas sporas neras ei problematic pil carstgaun. Ins sa fladar en ellas, quei che caschuna in'inflamaziun dil lom cun fermas attaccas da tuos ed ulteriurs effects.

Ludovic Sgier emprems al turnier da troccas

52 trochistas e trochists ein semesirai a Sagogn

■ (fmr) Dacuort ha il turnier da troccas giu liug per la novavla gada a Sagogn. Igl organisatur Johann Cantieni ha astgau beneventar el num dall'uniun Pro Sagogn 52 trochistas e trochists.

Renata Cathomas da Glion ei, cun sia experientscha, puspei semessa a disposiziun sco menadra dil giug. Nus havein giu participonts ord la regiun da Cuera tochen Mustér e Sedrun. Quei muossa che la damonda per turniers, nua ch'ei va buca per la pial e nua che negin sto haver retenientschas da separticipar, ei avon maun.

Quei ei era la motivaziun per Pro Sagogn da cuntinuar cull'organisaziun dil turnier da troccas a Sagogn. Ins sa era constatar che giuven e vegl, dunnas ed umens, ein separticipai al turnier. La pli giuvna participonta haveva mo otg onns ed il pli vegl datier d'otgonta onns. Denter ils 52 participonts eran era 15 dunnas. *Annalea Cabernard* da Glion ha, malgrad sia vegliadetgna da mo 10 onns, schizun contonschiu il secund rang.

Rangaziun dils emprems 26

1. Ludovic Sgier, 10 puncts/105 buns; 2. Annalea Cabernard, 8/96; 3. Orlando Buchmeier, 8/91; 4. Arno Casanova, 8/81; 5. Michael Cadruvi, 8/69; 6. Stefania Bearth, 8/55; 7. Tarcisi Pfister, 8/49; 8. Pia Blumenthal, 7/39; 9. Sep Cadruvi, 7/9; 10. Tumaisch Valier, 7/3; 11. Paul Marty,



Ils treis emprems dil turnier: Annalea Cabernard, 10 onns, ei daventada secunda. Enamiez il victur Ludovic Sgier, dretg il tierz Orlando Buchmeier.

MAD

6/68; 12. Mario Werth, 6/51; 13. Leonard Cavign, 6/49; 14. Arthur Cantieni, 6/48; 15. Claudio Camathias, 6/43; 16. Laura Jemmi, 6/32; 17.

Vitus Dermont, 6/32; 18. Giacun Dermont, 6/29; 19. Casper Deflorin, 6/14; 20. Meinrad Cadruvi, 6/12; 21. Fadri Beeli, 6/9; 22. Flavio Huonder, 6/

5; 23. Marita Buchli, 6/-10; 24. Fridolin Cahenzli, 6/-24; 24. Astrid Duff, 6/-24; 26. Gieri Maisen, 5/25.

FRACZIUN PCD

Per la nova lescha d'energia

(cp/fmr) La fracziun da la pcd en il cussegl grond sustegna tant il program dal guvern sco la nova lescha d'energia. Beneventà vegn che la regenza metta accents sin il sectur da digitalisaziun, innovaziun e Green Deal.

Deplorà è dentant vegnì che la regenza grischuna n'haja betg fixà ina vaira prioritaziun. Era duai la regenza examinar tge posts che possian vegnir manads era decentralmain per rinforzar las regiuns. Persuenter s'engascha la pcd. Vegnì crititgà è che la regenza haja mess memia pauc precisamain ils accents tar la politica da furmazion e scolaziun. Sustegnidas vegnan las directivas che garanteschan in stabil tegnaichasa finanziel.

La fracziun da la pcd ha predeliberà la revisiun parziala da la nova lescha d'energia e la sustegna. Quella lescha pretendia che bajetgs novs stoppian vegnir eregids energeticamain tenor il nov stan da la tecnica.

Ina maioritad da la fracziun è per procurar tar bajetgs novs da principi obligatoriamain ch'ina part da l'electricitad basegnaivla saja da cuvrir tras indrizz che sa chattian en u ordaifer ils bajetgs.

Quai saja ina contribuziun impurtanta ed indispensabla per cuntanscher las finamiras actualas da la politica per il clima.